

廿二史考異

宋史十四

廿二史攷異八十

錢大昕學

周必大傳

婺州四年易守者五平江四年易守者四按必大此
奏在乾道七年以吳郡志牧守題名攷之乾道三年
直祕閣姚憲知府事五年憲改兩浙運判而敷文閣
待制徐嘉代之六年嘉除宮觀而端明殿學士汪應
辰代之是年應辰除宮觀而觀文殿學士魏杞代之
所謂四年而更四守也

留正傳

六代祖從效事太祖爲清遠軍節度使封鄂國公 清遠當作清源從效事見世家此但當云清源軍節度使從效之六世孫

紹興十三年第進士 按正卒於開禧二年丙寅年七十八則是生於建炎三年己酉至紹興十三年纔十有五歲耳恐登第不當如是之少今據曾宏父鳳墅帖跋稱梁文靖紹興庚辰魁多士先君少師乃是年擢第與留忠宣俱爲同年友知留正實紹興三十年進士傳寫顛倒以三十爲十三耳

子恭丙端皆爲尚書郎 按恭在嘉定初提舉浙西營

平改浙西提刑知紹興府

黃裳傳

遷國子博士以母喪去 按樓鑰撰墓志其時除國子

錄非博士也

林大中傳

知撫州金谿縣郡督輸賦急大中請寬其期不聽納告
勅投劾而歸 按樓鑰撰神道碑云郡督財計太急
公請寬以歲月不敢有負又貽書再三不聽公取告
勅納之州請劾而去守媿謝許之邑民感公恐其受
責競輸於郡視歲額反加焉然則未嘗投劾歸也

詹體仁傳

光宗卽位提舉浙西常平除戶部員外郎湖廣總領

按吳郡志朝奉郎張體仁淳熙十六年六月時光宗已卽位

到浙西常平任紹熙元年十月除戶部郎官湖廣總領卽其人也今蘇州府學有石刻同年謦唱詩亦題浦城張體仁元善而史作詹其更姓之故史家失書攷葉適撰墓誌云初後其舅張氏旣復爲詹氏

梁汝嘉傳

紹興二十三年卒 汝嘉仕高宗朝不與韓侂胄同時乃與胡紘何澹諸人同卷且殿之卷末殊失其次論

內亦絕不及汝嘉此編次之誤也權邦彥紹興初執政乃列於趙雄程松之間亦失其次列傳第百五十八卷鄭毅仇愈高登婁寅亮宋汝爲五人皆高宗朝士而卷次乃在光寧朝臣之後編第尤爲乖刺

徐應龍傳

字允叔 史失書里居據徐清叟題名石刻乃建安人知瑞州高安縣 瑞州當作筠州避理宗諱追改

子榮叟官至參知政事謚文靖淡叟官終將作監丞清叟知樞密院事兼參知政事各有傳 按榮叟傳在

百七十八卷清叟在百七十九卷淡叟初未有傳也

榮叟傳但云簽書樞密院事不云參知政事又不載
文靖之謚

王阮傳

曾祖韶神宗時開熙河擒木征祖厚繼闢湟鄯 當云
曾祖韶祖厚自有傳

陸游傳

陸補登仕郎 祖孫父子各有傳而不同卷者例當互
見以徵世系陸游爲尚書左丞佃之孫以陸入官而
兩傳絕無一言及之何也

紹熙元年遷禮部郎中兼實錄院檢討官 按陸游渭

南集跋松陵集云淳熙十六年四月二十六日子以
禮部郎兼膳部又攷劔南詩稿有南省宿直詩在已
酉元日之後行在春晚之前則其除禮部郎必在淳
熙十六年之春正光宗卽位之初也集中又有跋金
奩集一篇題云淳熙已酉立秋觀于國史院直廬則
其兼史局檢討亦在是年立秋以前也其冬卽被劾
還里故齋中雜感詩有去國已酉冬之句明年改元
紹熙游已奉祠去官矣游以提舉冲祐觀慶元五年
致仕明年加直華文閣嘉泰二年有詔以元官提舉
佑神觀兼實錄院同修撰兼同修國史蓋自禮部罷

官奉祠者十年致仕又三年而後應修史之召本傳
所書太疏漏矣

遂升寶章閣待制 寶章當作寶謨

嘉定二年卒年八十五 按陳氏書錄解題云嘉定庚
午年八十六而終今攷劔南集有絕句詩云嘉定三
年正月後不知幾度醉春風則嘉定三年正月游尚
無恙傳云年八十五者非也

邱密傳

其西路則同轉運使張頴揀刺爲御前武定軍以三萬
人爲額分爲六軍 按兵志淮西廬州有武定游奕

軍濠州有武定選鋒軍武定後軍定遠有武定軍

當

左軍脫

安豐有武定前軍武定右軍所謂六軍也

宇文紹節傳

父子皆以使北死無子孝宗愍之命其族子紹節爲之
後按樓鑰撰宇文師說墓志紹節實師說之少子
師說父時中則虛中弟也

汪大猷傳

沒贈二官 据周必大撰神道碑大猷本宣奉大夫遺
奏贈特進中隔金紫銀青光祿兩階乃是贈三官也

李孟傳傳

嘗誠其子孫曰安身莫若無競修己莫若自保守道則
福至求祿則辱來 四語本玉弼注易

商飛卿傳

金陵故有帥漕治所合戎騎二帥留鑰內侍號六司

帥司謂江東安撫使司漕司謂江東轉運使司戎司
謂御前諸軍都統制司騎司謂侍衛馬軍司留鑰內
侍謂行宮匙鑰司以內侍一員掌之凡五司併江東
淮西總領所是爲六司

洪咨夔傳

嘉定二年進士 按嘉定二年非貢舉之歲當從咸淳

臨安志作嘉泰

史嵩之入相召赴闕下進刑部尚書 按理宗紀咨夔
卒於端平三年六月其時嵩之尚未入相且咨夔方
在朝任用何以又有召赴闕之語傳殆誤也及檢臨
安志人物傳云時有自詭和戎除刑書者咨夔繳駁
之乃出方悟此傳致誤之由夫所謂自詭和戎者卽
史嵩之也嵩之除刑部意在大用因咨夔繳駁改除
外任史乃謂嵩之入相召赴闕下似咨夔爲嵩之所
引者豈非顛倒黑白之甚者乎本是嵩之除刑部尚
書今以爲咨夔之官益荒唐可笑矣

加端明殿學士卒 按咨夔有子黜黜皆通顯黜字伯魯登淳祐四年進士少爲崔與之魏了翁所知仕至兵部尚書謚文靖傳何以略而不書

吳昌裔傳

蚤孤與兄泳痛自梳立 按泳傳在第一百八十二泳字叔永昌裔字季永泳傳云潼川人而昌裔傳云中江人中江卽潼川屬縣也於史例當合傳今旣分而二之又云兄泳自有傳失史法矣

陳必傳

丞相俊卿之子 史家之病在乎立傳太多祖孫父子

事迹可比附者當連而及之如王素當附其父旦傳
劉瑾當附其父沆傳魯有開當附其從父宗道傳張
瓌張璪當附其祖洎傳孫瑜當附其父奭傳馬仲甫
當附其父亮傳吳遵路當附其父淑傳而以子瑛次
之張燾當附其父奎傳王堯臣當與叔父洙合傳楊
寘當附其兄察傳尹源當附其兄洙傳顏復當附其
父太初傳王桾當附其祖倫傳宇文紹節當附其祖
虛中傳李孟傳當附其父光傳張忠恕當附其祖浚
傳陳宓當附其父俊卿傳袁甫當附其父燮傳蔡抗
當附其祖元定傳孟珙當附其父宗政傳趙葵兄弟

列傳
當附其父方傳陸持之當附其父九淵傳洪芹當附
其會祖适傳

少嘗及登朱熹之門 按宋史最推崇道學而尤以朱

元晦爲宗朱氏門人黃榦李燔張洽陳淳李方子黃
灝既入道學傳而儒林傳又列蔡元定及子沈廖德

明葉味道四人至如詹體仁傳則云少從朱熹學任

希夷傳則云從朱熹學陳必傳則云少及登朱熹之

門劉煥傳則云與弟韜仲受學於熹王介傳則云從

熹游曹彥約傳則云嘗從熹講學傅伯成傳則云少

從熹學徐僑傳則云登熹之門黃芾傳則云嘗從熹

學薛叔似傳則云雅慕朱熹窮道德性命之旨趙蕃
傳則云年五十猶問學于熹趙汝談則云嘗從熹訂
疑義十數條熹嗟異之陳韡傳則云父孔碩爲熹門
人包恢則云父揚世父約叔父遜從熹學杜範傳則
云從祖受學熹牟子才傳則云學于魏了翁又從李
方子朱熹門人也吳昌裔傳則云聞漢陽守黃榦得
熹之學往從之董槐傳則云聞輔廣者朱熹之門人
復往從廣趙葵傳則云遣從南康李燭爲有用之學
黃師雍傳則云從黃榦學徐元杰傳則云聞陳文蔚
講書鉛山實熹門人往師之李道傳則云雖不及登

熹之門而訪求所嘗從學者與講習趙景緯傳則云
恨不及登熹之門熹門人葉味道謂之曰度正吾黨
中第一人也由是往來味道正之間史彌鞏傳則云
子蒙卿著書立言一以朱熹爲法蓋自嘉定以後朱
學盛行理度二宗皆以尊尚道學爲先務故一時士
大夫莫不援附朱氏淵源以自重耳

徐經孫傳

字子立 史失書其里居

牟子才傳

作書與孔光張禹切責清之 與當作以

又寫力士脫鞵之狀爲之贊而刻諸石 按子才所刻
太白脫鞵山谷返權二圖在太平州學今尚存

趙汝談傳

字履常 按汝談汝謙希館彥呐四人傳失書其世系
與它篇異且宗室子直等廿五人傳既列於諸王之
次而汝談等七人別編於南渡諸臣之列均爲宗室
何以區分如此此亦體例之可議者竊謂宋之宗室
唯汝愚當自爲傳而以子崇憲孫必愿曾孫良淳附
焉其餘皆可類叙爲一卷汝騰與憲不試令成師檟
與樾士隆伯振時賞希洎孟采等亦當入宗室傳毋

庸散入別篇

楊氏宋史新編并汝愚父子亦入宗室餘俱與子說同

趙與權傳

時嵩之猶子璟卿誦言其過忽斃而杜範劉漢弼徐元

杰三賢暴死人皆疑嵩之致毒 按徐劉二人暴卒

當時疑嵩之所爲三學諸生上章論列置獄鞫治然

卒無驗攷其時嵩之失權歸里已半年矣鄞與臨安

相隔又遠謂能肆毒於朝貴此理之難信者人云亦

云姑存爲莫須有之案可也若杜範暮年入相力疾

赴召本傳於範之薨初無疑詞以是咎嵩之未免疾

之已甚矣程公許奏元杰事云漢弼之死固可疑範

之死人言籍籍然漢弼類風淫末疾範亦尪弱多病
諉曰天命猶可也則公許於範之死亦未嘗質言也

史彌遠傳

彌遠力陳危迫之勢皇子詢聞之亟具奏乃罷侂冑并
疎自強右丞相旣而臺諫給舍交章論駁侂冑乃就
誅按彌遠稱奉密旨十一月甲戌翌日侂冑入
朝已爲夏震所誅其時詔旨尚未宣布外廷何待臺
諫給舍交章論駁而始就誅乎史家欲寬彌遠擅殺
之罪故爲此語

寧宗崩擁立理宗按彌遠之姦倍于侂冑而獨不預

姦臣之列傳于謀廢濟王事并諱而不書尚得云直
筆乎推原其故則以侂冑禁僞學而彌遠弛其禁也
彌遠得政祇欲反侂冑之局雖秦檜之姦慝衆著尚
且爲之昭雪豈能崇尚道學者使朱元晦尚存未必
不排而去之史臣徒以門戶之見上下其手可謂無
識矣

鄭清之傳

是時金雖亡而入洛之師大潰 按端平入洛之師最
爲無名趙范全子才輩寡謀召囂固不足責而主張
其事者清之也理宗德其立已之功委任如故而傳

亦諱之竟若置身局外者難以言直筆矣

史嵩之傳

慶元府鄞人 當云彌遠從子不必更舉里居其父彌
忠官亦顯而傳失書

傅伯成傳

兩爲部使者 按劉克莊撰伯成行狀云知撫州未至
除湖北提舉常平改成都路提點刑獄卽傳所云兩
爲部使者也

遷工部侍郎 行狀無待字下文方云進右司郎官則
此時當除工部郎官非侍郎也

御史中丞鄧友龍遂劾伯成罷之 據行狀劾罷之後
復除浙東提刑遷直龍圖閣知慶元府皆有政績而
傳失書

拜左諫議大夫 據行狀論倪思李壁二事在拜諫議
之後傳所書蓋失其次行狀又云高似孫嘗獻侂胄
九詩皆有錫字公論其有無君之心丁常任以嘗諫
用兵牽復公言常任始結曾覿後結蘇師旦前口之
議非真知兵之不可用受教於師旦耳此二事亦傳
所當書也

以集英殿修撰知建康府 建康當作建寧

嘉定八年召赴闕 上文有嘉定元年此不當更有嘉定字據行狀嘉定四年請祠進煥章閣待制提舉太平興國宮傳又失書

除寶謨閣直學士通奉大夫致仕 按行狀是年除寶謨閣直學士提舉玉隆萬壽宮十年告老不獲提舉鴻慶宮十二年復請老進顯謨閣直學士通奉大夫致仕蓋是年自待制遷直學士猶食祠祿及再任祠祿滿始易閣銜致仕也傳誤合爲一事

理宗卽位升直學士 直當作真伯成久爲直學士矣 此由直學士升學士故云真

葛洪傳

進端明殿學士同簽書樞密院事 宰輔表嘉定十七年十一月洪除同簽書樞密院事實慶元年十一月進簽書樞密院事紹定元年十二月除參知政事傳失書簽書一節

曾三復傳

乾道六年進士 按三復之子宏父刻鳳墅法帖其跋云梁文靖紹興庚辰冠多士乾道壬辰入相南渡百年以大魁秉鈞方見文靖先君少師乃是年擢第與留忠宣俱爲同年詳其文義謂三復亦紹興庚辰進

士與梁留二相爲同年耳林大中亦紹興三十年進士故與三復帖自稱年末也史於留正傳云紹興十三年第進士蓋三十字誤顛倒耳此傳作乾道六年尤誤豈誤讀鳳墅帖謂三復以乾道壬辰擢第壬辰本乾道八年又譌八爲六耶宋時進士三年一舉常以辰戌丑未年乾道六年庚寅非科舉之歲也

轉太常少卿 按金史交聘表明昌六年正月宋試禮部尚書會三復賀正旦卽宋慶元元年也本傳失書趙葵傳

淳祐四年授同知樞密院事十二月拜知樞密院事兼

參知政事又特授樞密使兼參知政事督視江淮京
西湖北軍馬封長沙郡公尋知建康府行宮留守江
東安撫使 按理宗紀葵以淳祐四年十二月同知
樞密院事五年十二月知樞密院事兼參知政事七
年四月授樞密使兼參知政事督視江淮京西湖北
軍馬尋兼知建康府行宮留守江東安撫使宰輔表
所書年月亦與紀同惟以知建康府行宮留守江東
安撫使封長沙郡公繫于八年五月攷景定建康志
葵知府事在七年六月九日蓋表誤也傳所書年月

殊疏漏

吳潛傳

字毅夫宣州寧國人 按中興館閣續錄潛字毅夫建康府溧水人四明續志潛自署金陵吳潛毅父與館閣錄合

授承事郎簽鎮東軍節度判官 按南宋諸臣列傳於

寄祿官皆略而不書此傳云授承事郎轉朝散郎轉中大夫與宅傳異蓋史臣不諳官制芟削有未盡也

戈宙襄云楊簡傳中載寄祿官亦甚詳

端平元年詔求直言潛所陳九事 按景定建康志潛自淮西總領端平元年四月二十七日准省劄除祕

閣修撰樞密都承旨五月六日離任此應詔言事必
在入朝以後傳失書除樞密承旨一節

以久任勾祠且累章乞歸田里進封慶國公 按四明
續志寶祐四年九月大使丞相吳公出鎮開慶元年
八月十七日再疏乞歸田里奉御筆吳潛三年海關
備竭勤勞屢疏乞歸高節可尚可依舊觀文殿大學
士判寧國府特進封崇國公史作慶國則與下文進
封慶國重出當依四明續志改正

屬將立度宗爲太子潛密奏云臣無彌遠之材忠王無
陛下之福帝怒 按劉應龍傳亦云理宗久無子以

弟福王與芮之子爲皇子宰相吳潛有異論今以時
事攷之殊不近情蓋潛於端平初奏事已有植國本
之語其後又有請養宗子以係國本之奏其後又有
遴選近族以係人望之奏豈容皇子既立之後更有
異議且立度宗爲皇子在寶祐元年其時潛固未在
朝若復相之後皇子名分久定豈有彌遠更立之嫌
尤爲擬不於倫矣推原其故特以鄂圍未解潛有遷
幸之議爲帝積銜故似道之請易入乃贊成建立東
宮授意臺諫謂其不樂建儲耳

文天祥傳

南官王績翁 元史作積翁附見其子都中傳却載

薦天祥事

宣緒傳

慶元府人 按緒官至執政而傳無一事可紀攷袁燮

絜齋集有何夫人宣氏墓志卽緒之妹也志稱其母
史氏故太師越忠定王之從妹則緒實以史氏甥爲
彌遠援引而傳隱而不言

陳宗禮傳

字立之 史失其里居

史彌鞏傳

子能之有之胄之俱進士能之咸淳初由太府寺丞知常州撰毘陵志三十卷

楊大異傳

除祕閣修撰太中大夫提舉崇禧觀醴陵縣開國男食邑三百戶賜紫金魚袋按五等之封唯國公郡公書之自侯以下例不書食邑食實封賜緋紫例皆不書太中大夫寄祿官也亦可不書以史例言之但當云除祕閣修撰提舉崇禧觀耳

宋史十五

廿二史攷異八十一

錢大昕學

循吏傳

趙尚寬 河南人參知政事安仁子也 按安仁傳有

子溫瑜良規承裕無尚寬名

高賦 乞於禁中建閣繪功臣像如漢雲臺唐凌烟之

制 按元豐中繪功臣像於景靈宮其議自賦啟之

道學傳一

邵雍高明英悟程氏實推重之舊史列之隱逸未當

舊史者四朝國史也東都事略亦入隱逸傳

張栻之學亦出程氏既見朱熹相與博約又大進焉其
它程朱門人攷其源委各以類從作道學傳 按宋
史勦立道學傳別于儒林意在推崇程朱之學如劉
勉之劉子翬胡憲元晦之師也呂祖謙元晦之友也
皆不入道學而獨取張栻一人栻與祖謙均爲元晦
密友乃退呂而進張豈以呂之博不如張之約乎狀
元晦亦未始不博也呂大臨在程門四先生之列而
不入道學傳以附見大防傳也栻不附其父而大臨
獨附其兄非有心抑呂乎蔡元定父子朱氏門人之
尤著者乃入儒林而不入道學此又何說乎張戩附

見載傳而邵伯溫又別入儒林此皆義例之可議者也

程顥 世居中山後從開封徙河南高祖羽太宗朝三司使 按列傳第二十一卷有程羽淡州陸澤人太宗朝官文明殿學士兵部侍郎不云爲三司使疑非一人及攷程琳所撰世錄羽生希振希振次子適官黃陂令適三男响則適之長子世系分明亦不言羽爲三司使韓維撰顥墓志但云高祖贈太子少師羽則羽未嘗爲三司使可信也當云高祖羽自有傳張載沐浴夏衣而寢旦而卒 按載弟戡年四十七

具書於傳而載之年壽史乃失書此闕漏也子按列傳失書諸臣年壽今尚可攷見者冠準年六十三呂夷簡年六十六曹利用年五十九曹瑋年五十八丁謂年七十二劉筠年六十一孫奭年七十二馬亮年七十三薛映年七十四陳從易年六十六楊大雅年六十九胥偃年五十七陳執中年七十王隨年六十七章得象年七十一晏殊年六十五宋庠年七十宋祁年六十四魯宗道年六十四韓億年七十三宋綬年五十程琳年六十九薛奎年六十八司馬池年五十三孔宗翰年六十四孔道輔年五十四周起年五十

九丁度年六十四段少連年四十六彭乘年六十五
蔣堂年七十五燕肅年八十趙師民年六十九晁宗
懋年五十八狄棐年六十七梅詢年七十八孫甫年
六十俞獻卿年七十六魏瓘年七十一許元年六十
九張錫年六十八狄青年五十石元孫年七十三歐
陽修年六十六王堯臣年五十六余靖年六十五王
洙年六十一王質年四十五胡瑗年六十七尹源年
六十石延年年四十八孫復年六十六石介年四十
一梅堯臣年五十九蘇舜欽年四十一江休復年五
十六蘇洵年五十八張載年五十八劉綸年四十二

游酢年七十一尹焞年七十二汪藻年七十六汪伯
彥年七十三趙鼎年六十三胡銓年七十九韓世忠
年六十三梁汝嘉年五十九汪大猷年八十一范成
大年六十八婁機年七十九陳居仁年六十九劉清
之年五十七陸九淵年五十四陳亮年五十五蔡沈
年六十四真德秀年五十八

邵雍 年七十六 程顥撰雍墓志云熙寧丁巳孟秋
堯夫先生疾終於家先生生於祥符辛亥至是蓋六
十七矣傳云七十六誤

道學傳二

尹焞 世爲洛人曾祖仲宣七子而二子有名長子源
字子漸是謂河內先生次子洙字師魯是謂河南先
生源生林官至虞部員外郎 按源與洙各有傳此
傳但當云知懷州源之孫

道學傳三

朱熹 本部侍郎林栗嘗與熹論易西銘不合劾熹本
無學術徒竊張載程頤緒餘謂之道學所至輒攜門
生數十人妄希孔孟歷聘之風邀索高價不肖供職
其僞不可掩上曰林栗言太過太常博士葉適上疏
與栗辨謂其言無一實者謂之道學一語無實尤甚

往日王淮表裏臺諫陰廢正人蓋用此術 林栗葉
適兩疏詳見二人本傳此重出

父松病亟嘗屬熹曰籍溪胡原仲白水劉致中屏山劉
彥沖三人學有淵源吾所敬畏吾卽死汝往事之而
惟其言之聽三人謂胡憲劉勉之劉子翬也 此事
已載熹傳而又爲三人立傳敷衍其說無複如此何
怪乎汗青無日也

張栻 明年召爲吏部侍郎 按下文方除左司員外
郎此時豈得卽爲侍郎史誤也按朱熹撰神道碑召
爲吏部員外郎兼權左右司侍立官

儒林傳一

孫奭 贈左僕射 賈昌朝撰奭神道碑云贈太尉封

樂安郡公

瑜官至工部侍郎致仕 當云瑜自有傳

孔宜 孔子生鯉字伯魚 按列孔子後于儒林始於

東都事略而宋史因之篇中備載歷代褒崇之典及
紹襲次序然自伯魚至于延年世次見於漢書初無
受封之事毋庸載也宋典以孔宜襲文宣公子孫相
承後改爲衍聖公南渡後猶勿替史家當攷其世系
行事列之本傳而自宜以下所載惟延世聖祐兩代

餘皆闕如禮志載文宣公襲封則自四十六世孫宗
愿始而宜延世聖祐又不及焉皆所謂自亂其例也
若併爲一條則首尾相應矣文苑顏太初傳文宣公
孔聖祐卒無子除襲封且十年蔡齊爲言于上遂以
聖祐弟襲封據闕里文獻攷宗愿爲延世弟延澤之
子實聖祐之從弟

加謚孔子爲元聖文宣王追封孔子父叔梁紇齊國公
母顏氏魯國太夫人 此事已見禮志

時昂爲殿中丞通判廣州王欽若言其有聲于鄉曲召
赴闕改太常博士賜緋令知曲阜縣 此事又見孔

道輔傳但彼傳不載欽若名

後改名道輔爲左司諫龍圖閣待制自有傳 道輔官

不止司諫職亦不止待制此傳誤

田敏 又爾雅椴木槿注日日及改爲白及 按抱朴

子論僊篇云浮蟬校巨鼈白芟料大椿白芟亦日及
之譌古書爲後人妄改如此者不少矣

崔倕

倕 臣聞刀用爲角音兩點爲角音一撇一點俱

不成字 予謂角古音祿詩麟之角與族叶誰謂雀

無角與屋獄叶廣韻餘東方音卽角徵之角也後世
轉讀如覺唯漢書角里字猶存古音而俗人妄造加

撇加點或加兩點皆可笑之甚僿俗生一時妄對
史家不加辯證而載之本傳陋矣自古未有不識字
而能通經者卽此一事不當濫入儒林

李之才 友人尹洙以書薦于中書舍人葉道卿 道
卿者清臣也史當書名而稱字蓋沿志狀之文清臣
嘗爲知制誥故以舍人稱之

儒林傳二

胡旦 有備書人翟穎者旦嘗與之善因爲改姓名馬
周以爲唐馬周復出上書詆時政且自薦可爲大臣
又舉材任公輔者十人其辭頗壯當時皆謂旦所爲

此事又見趙昌言傳

王向 戲作公默先生傳 列傳所載文如王向之公
默先生傳夏侯嘉正之洞庭賦朱昂之廣閑情賦路
振之祭戰馬文羅處約之黃老先六經論詞既不工
亦無關于勸戒皆可刪也陳彭年爲五鬼之一則大
寶箴不足錄種放無管寧之操則景德詔書不足錄
儒林傳三

林之奇 紫微舍人呂本中 當云中書令人蓋訟時
俗之稱

儒林傳四

攷異

宋史十五

七

葉適 俄得御批有歷事歲久念欲退閑之語正懼而
去人心愈搖 此語寧宗紀吳皇后留正趙汝愚諸
傳已屢見矣且紹熙內禪汝愚寔主之適以郎官與
聞斯議而傳敘其事首尾三百餘言蓋文人作誌狀
者攘美之詞史家因而書之斯無識矣

儒林傳五

范冲 字元長 當云祖禹之子

胡宏 高閔爲國子司業請幸太學宏見其表作書責
之 宏書已見本傳而閔傳又略載其語當刪存其

儒林傳六

李道傳 隆州井研人父舜臣嘗爲宗正寺主簿 按舜臣心傳道傳性傳父子四人各自爲傳道傳心傳又同在儒林而分入兩卷不相比附此亦體例之可議者也心傳性傳傳首俱云宗正寺主簿舜臣之子而不書籍貫於史例尚合此傳書籍貫書父某官而不云有傳蓋秉筆者非一人不知舜臣已有傳故也

儒林傳七

劉清之 州有民妻張以節死嘉祐中詔封旌德縣君表其墓曰烈女中夏兵火至是無知其墓者清之與

郡守羅願訪而祠之 張氏已見列女傳此事可附
見彼傳

文苑傳一

和峴 開封浚儀人 按和峴凝之子五代史凝傳云
鄆州須昌人而宋史稱開封浚儀人馮吉道之子五
代史道傳云瀛州景城人而宋史稱河南洛陽安德
裕重榮之子五代史重榮傳云朔州人而宋史稱河
南高懷德行周之子五代史行周傳云媯州人而宋
史稱真定常山王侁朴之子五代史朴傳云東平人
而宋史稱開封浚儀張籍文蔚之子五代史文蔚傳

云河間人而宋史稱河南洛陽安忠叔干之孫五代
史叔干傳云沙陀三部落人而宋史稱河南洛陽

文苑傳二

宋準 族子郊祁並天聖二年進士甲科別有傳 並
天聖以下九字可省郊傳云安州安陸人後徙開封
之雍邱

文苑傳三

淇湛 昇之上元人 按新安志以爲休寧人

路振 又嘗采五代末九國君臣行事作世家列傳書
未成而卒 藝文志路振九國志五十一卷卽此書

也

文苑傳四

蘇舜欽 舜欽娶宰相杜衍女衍時與仲淹富弼在政
府多引用一時聞人欲更張庶事御史中丞王拱辰
等不便其所爲會進奏院祠神舜欽與右班殿直劉
巽輒用鬻故紙公錢召妓樂閒多會賓客拱辰廉得
之諷其屬魚周詢等劾奏因欲搖動衍 此事又見
王拱辰傳當去彼存此

其友人韓維責以世居京師而去離都下隔絕親交

按易簡傳稱梓州銅山人此云世居京師蓋宋世朝

士多寓居洛罕有返故鄉者

顏太初 徐州彭城人 太初子復別有傳彼稱魯人

此稱徐州地名互異據此傳云所居在鳧繹兩山之間則當爲魯人矣

是時有醫許希以鍼愈仁宗疾拜賜己西向拜扁鵲曰不敢忘師也帝爲封扁鵲神應侯立祠西城 此事又見方技傳長編嘉祐八年三月封神應侯扁鵲爲神應公

文苑傳五

蘇洵 乃以爲霸州文安縣主簿與陳州項城令姚闢

同修禮書 此文安主簿與項城令皆選人階官非
莅其任也程顥爲上元主簿晉城令歐陽修爲夷陵
令則皆履其任矣

黃伯思 其遠祖自光州固始徙閩爲邵武人祖履資
政殿大學士 當云祖履自有傳

文苑傳六

晁補之 濟州鉅野人太子少傅迥五世孫宗懋之曾
孫也 按迥傳云澶州清豐人自其父佺始徙家彭
門蓋迥之後又徙鉅野也

郭祥正 知瑞州 瑞當爲端今肇慶府七星巖有石

刻云元祐戊辰二月廿有八日當塗郭祥正子功來
治州事明年上書乞骸骨此其證也南渡後避理宗
嫌名改筠州爲瑞州元祐之際尚無瑞州也

米芾 吳人也 按蔡肇撰芾墓志云世居太原後徙
襄陽嘗過潤州愛其江山遂定居焉卒葬丹徒長山
下傳云吳人者蓋据寶章待訪錄有子居蘇與葛藻
近居之語然芾書畫每自題襄陽米芾其居蘇不過
偶然游歷詎可竟目爲吳人乎

以母侍宣仁后藩邸舊恩 呂居仁軒渠錄元章母入
內祇應老嫗元章以母故命官厥後爲禮部員外郎

言者詆其出身冗濁不宜冒玷清選遂罷知淮陽軍
蓋以此也

卒年四十九 按米芾跋晉謝安真蹟帖云余生年辛
卯是芾生于皇祐三年矣寶晉英光集有紹聖二年
八月十八日浙江亭觀濤詩注云時年四十五正與
辛卯生年相合崇寧四年除禮部員外郎是年歲次
乙酉芾年五十有五蔡肇撰墓志云年五十七卒於
淮陽郡齋可證宋史之誤

文苑傳七

陳與義 其先居京兆自曾祖希亮始遷洛故爲洛人

按希亮傳其先京兆人唐廣明中逢難遷眉州青神之東山不云遷洛希亮子慤又隱居光黃間而蘇子瞻爲作傳稱洛陽園宅北廐與公侯等此希亮遷洛之證也

葉夢得 紹興初起爲江東安撫大使兼知建康府兼壽春等六州宣撫使 六州謂壽春府滁濠廬和四州及無爲軍也景定建康志紹興元年十一月夢得以資政殿學士左中大夫知府事二年閏四月提舉臨安府洞霄宮八年六月再以資政殿學士左中大夫知府事兼制置大使兼留守史失書中問奉祠一

節

程俱 徐俯爲諫議大夫俱繳還以爲俯雖才俊氣豪
所歷尚淺以前任省郎遽除諫議自元豐夏制以來
未之有也昔唐元稹爲荆南判司忽命從中出召爲
省郎便知制誥遂喧朝聽時謂監軍崔渾峻之所引
也近聞外傳俯與中官唱和有魚須之句號爲警策
臣恐外人以此爲疑仰累聖德陛下誠知俯姑以所
應得者命之不報 此疏又見俯傳

宋史十五終

宋史十六

廿二史攷異八十二

錢大昕學

忠義傳三

李彥仙 乾道八年易謚忠威 按揮廬後錄彥仙謚

忠節

忠義傳四

崔縱 吳安國林沖之滕茂實魏行可郭元邁閻
進朱勸諸人皆奉使不屈者當與朱弁張邵等合傳

忠義傳五

李芾 贈端明殿大學士 大字疑衍

攷異

忠義傳七

李大成 文定公李迪之從子也 此文定未詳其人

若天禧宰相則年代遠不相涉

忠義傳八

王拱 拱當作琪贈太師德之第三子史失其世系

詔贈正任觀察使 景定建康志贈閩州觀察使

孫逢 孫逢喻汝礪李熙靖趙俊姚邦基劉化源米璞

劉長孺李嘉皆不臣僭偽宜收入卓行傳

忠義傳十

鄒鳳 自鳳以下一十九人皆從文天祥勤王歿事者

當附見天祥傳

忠義傳十

楊宏中

孝宗崩光宗以疾不能執喪時趙汝愚知樞

密院奏請太皇太后迎立寧宗于嘉邸以成喪禮朝野晏然遂命汝愚爲右丞相登進耆德及一時知名之士有意慶歷元祐之治韓侂胄竊弄國柄引將作監李沐爲右正言首論罷汝愚中丞何澹御史胡紘章繼上竄汝愚永州國子祭酒李祥博士楊簡連疏抹爭俱被斥本因宏中上書留祭酒等而及汝愚之竄逐又追敘汝愚定策之功首尾百廿餘言史之

冗複如此雖萬卷不能了也何不云祭酒李祥博士
楊簡以疏救趙汝愚被斥

孝義傳

陳競 陳宜都王叔明之後叔明五世孫兼唐右補闕
兼生京祕書少監集賢院學士無子以從子褒爲嗣
褒至鹽官令褒生灌高安丞灌生伯宣 伯宣卽競
之高祖也敘陳氏義門當自伯宣始今自灌以上一
一臚列似家乘非國史矣

姚宗明 縣令蘇轍 此唐人與子由同姓名

隱逸傳

戚同文 字同文 按戚綸傳同文字文約

王礪事母甚謹太平興國五年進士至屯田郎中子渙
瀆淵冲沅溟子稷臣瀆子堯臣並進士及第溟子夢
臣進士出身 礪卽洙之父也其事常見於洙與堯
臣傳洙當是洙字之謬

隱逸傳中

孫佺 字少述 史失其里居

吳瑛蘄州蘄春人以父龍圖閣直學士遵路任補太廟
齋郎 遵路淑之子淑傳云潤州丹陽人蓋瑛始居
蘄州也瑛當附遵路傳不必別入隱逸

至虞部員外郎 遵路傳作比部

松江漁翁 此子虛亡是之流非實有其人而史家以充隱逸之數可乎

方技傳下

魏漢津 或言漢津本范鎮之役稍窺見其制作而京託之於李良云 此語亦見樂志

外戚傳上

賀令圖 是役也武州防禦使高陽關部著楊重進夙之 重進當入忠義傳不應附外戚篇

劉從德 御史曹修古楊偕郭勸推直官段少連上疏

論之皆坐貶 按修古四人本傳皆載此事而修古傳兼載諸人名與此傳更爲重複

郭宗仁 守文之子 按郭宗仁符惟忠柴宗慶王貽

永李昭亮李遵勗曹份高遵裕向傳範孟忠厚錢忱皆勲舊之裔當從魏咸信王承衍諸人之例附見家傳

外戚傳下

孟忠厚 起復鎮海軍節度使 今紹興府城隍廟石

刻尚書省牒後題鎮潼軍節度使判紹興軍府事孟

忠厚各史作鎮海誤

鎮潼華州軍號也

五里
吳益 初旣建節以檜故授文資直祕閣檜進徽宗御製辭免加恩帝乃特命賜益三品服 宋時臣僚以帶職爲榮益雖緣外戚建節祇是武資以秦相門婿乃得換文資而除直閣章璞以少卿除煥章閣論者以爲非祖宗舊制遂換授明州觀察使亦其證也

鄭興裔 曾祖紳封樂平郡王祖翼之陸海軍節度使紳進封南陽郡王謚僖靖翼之贈魯國公謚榮恭見周必大所撰興裔神道碑史失書

叔父藻以子字之 藻封榮國公謚端靖亦見周必大集

宦者傳一

閻承翰

子文應西京左藏庫使

文應當卽鳩殺郭

后者彼傳云開封人而此云真定人籍貫雖異要非
兩人也

張繼能

大中祥符二年入內都知李神福等坐事悉

罷

神福當作神祐

宦者傳二

李舜舉

開封人世爲內侍曾祖神福事太宗以信謹

終始

神福事見前卷當云神福之子或合爲一篇

謚曰忠敏

王明清揮麈後錄作忠愍

宦者傳三

童貫 更武信武寧護國河東山南東道劔南東川等
九鎮 山南東道爲一鎮劔南東川爲一鎮實止六
鎮爾

宦者傳四

康履 統制苗傅等切齒曰此輩使天子至此猶敢爾
耶 此篇之文與苗傅傳略同者幾三百言

關禮 孝宗崩光宗疾不能執喪樞密趙汝愚等請建
儲以安人心光宗御批又有念欲退閑語丞相雷正
懼納祿去人心愈搖汝愚遣戚里韓侂胄因內侍張

宗尹以禪位之事奏太皇太后曰此豈可易言明日
汝愚再遣侂胄附宗尹以奏未獲命而侂胄退與禮
遇禮知其意問之侂胄不以告禮指天自誓不言侂
胄遂白其事禮卽入宮泣告太后以時事可憂之狀
且曰留丞相已去所恃者趙知院耳今欲定大計而
無太皇太后之命亦將去矣太后驚曰知院同姓也
事體與它人異禮曰知院未去恃有太后耳今有請
不許計無所出亦惟有去而已天下將若何太后悟
遂命禮傳旨侂胄以諭汝愚約明日太后垂簾上其
事 此事已見趙汝愚傳

姦臣傳一

章惇 哲宗崩皇太后議所立惇厲聲曰以禮律言之
母弟簡王當立皇太后曰老身無子諸王皆是神宗
庶子惇復曰以長則申王當立皇太后曰申王病不
可立惇尚欲言知樞密院事會布叱之曰章惇聽太
后處分 此事已見徽宗紀

姦臣傳二

趙良嗣 按良嗣覺藥師三人自北投南倘處置得宜
均可收其力用宋史列之姦臣殊非其倫藥師反覆
當在叛臣之列良嗣與覺宋既納之而又不能芘之

其死皆非其罪天之厭宋久矣宋之亡宋自亡耳豈
三人之咎哉

張覺 金史作張穀

姦臣傳三

秦檜 監察御史劉一止檜黨也言宣王內修修其所
謂外攘之政而已今簿書獄訟官吏差除土木營繕
俱非所當急者 此語已見一止傳但彼傳諱言檜
黨及自叛其說之事

浚求去帝問誰可代卿浚不對帝曰秦檜何如浚曰與
之共事始知其闇帝曰然則用趙鼎 此語亦見浚

攷異

宋史十六

七

傳

初帝無子建炎末范宗尹造膝有請遂命宗室令憲擇
藝祖後得伯琮伯玖入宮 按高宗建立宗子其議
始於婁寅亮而富直柔薦之其時宗尹方爲宰相或
亦預聞然宗尹直柔傳內絕不及之

二十二年又興王庶二子之奇之荀葉三省楊煒紫敏
求四大獄皆坐謫訕 按王葉楊三獄皆見本紀惟
敏求事紀失書 繫年錄是年十二月免解進士袁敏
求杖脊送海外州軍編管坐撰語言

故也索蓋
袁字之譌

姦臣傳四

丁大全 太學生陳宗劉敞黃唯陳宜中林則祖等六人伏闕上書 按自宗而下止有五人以宜中傳證之有黃鏞曾唯而無黃唯蓋此傳脫兩字也則祖彼傳作測祖恐誤

叛臣傳上

劉豫 字彥游景州阜城人也 今蘇門山有豫題詩 石刻自稱濟南劉豫其詩云我居東秦濟水南蓋豫雖生阜城實居濟南也豫字彥由當取易由豫大有得之義傳作游蓋音之譌當從石刻

叛臣傳中

攷異

宋史十六

八

李全 晞稷乃潛授世雄勝軍統制 雄字下當更有

雄字

世家序

王侂東都事略用東漢隗囂公孫述例置孟昶劉鋹等
於列傳舊史因之 此所云舊史者宋三朝國史也
三朝史乃仁宗朝史臣所修王侂撰東都事略則在
南渡以後即使體例相同亦是侂襲舊史非舊史襲
侂也如宋史所云是呂尚盜陳恒之齊矣

今倣歐陽修五代史記列之世家 按梁武帝通史叙
三國事別立吳蜀世家歐史蓋用其例以十國非五

代所得而臣其傳授世次較於五代亦稍長久列於世家頗爲允當藝祖削平僭僞南唐西蜀南漢諸國既無世可傳而猶沿歐史之目甚無謂矣李煜孟昶劉鋹劉繼元當依陳勝項籍世充建德之例列於開國功臣之前錢俶陳洪進納士入臣其初本未僭號可援寶融之例與功臣並列惜乎柯維騏輩見不及此也

南唐世家

請傳位於世子冀 本名上一字犯宋諱故史臣去之南漢世家

太祖幸講武池從官未集銀先至賜銀卮酒銀疑爲醜
泣曰臣承祖父基業違拒朝廷勞王師致討罪固當
歿陛下不殺臣今見太平爲大梁布衣足矣願延旦
夕之命以全陛下生成之恩臣未敢飲此酒太祖笑
曰朕推心於人腹安有此事命取銀酒自飲之別酌
以賜 此事已見太祖紀而彼文較簡當可悟史家
刊削之法

夏國傳

授夏州刺史充定難軍節度使夏綏銀宥靜等州觀察
處置押蕃落等使 唐制除節度使例兼觀察處置

等使及本州刺史宋時內地節鎮雖不之任結銜猶依此例

元豐以後始省去

史家省文但稱某軍節度使或書

所莅之州府云某州節度使而已此傳繼捧繼遷德明元昊除節度俱書全銜又交趾傳制投黎桓使持節交州諸軍事安南都護充靜海軍節度交州管内觀察處置等使黎龍廷李公蘊李龍翰陳威晃授靜海軍節度觀察處置等使安南都護闍婆傳建炎三年授國王懷遠軍節度琳州管内觀察處置等使使持節琳州諸軍事琳州刺史兼御史大夫沙州傳張義潮爲節度使領河沙甘肅伊西等州觀察營田處

置使皆冗贅可省

祥符五年德明追上繼遷尊號曰應運法天神智仁聖
至道廣德光孝皇帝元昊追諡曰神武廟號太祖

按下文又云五年德明追尊繼遷爲太祖應運法天

神智仁聖至道光

當作廣

德光孝皇帝廟號武宗於文

旣爲重出且太祖已是廟號而又云廟號武宗又何
說乎德明篇中敘事自大中祥符元年三年四年五
年以至七年八年九年而其下復有五年七年首尾
亦無倫次

夏國傳下

紹興七年十月僞齊知同州李世輔謀執金帥撒里曷歸宋不克遂奔夏世輔父母親族在延安者金人殺之無遺類九年乾順以世輔爲靜難軍承宣使鄜延岐雍等路經略安撫使世輔請兵將報延安之役夏主俾先討別種酋豪號青面夜叉者世輔擒之以報乾順乃爲出兵遣文臣王樞武臣哆訛等隨之世輔軍至延安撒里曷走耀州世輔購得害其父母者殺之東城聞金人降赦歸宋河南地乃說王樞等歸宋哆訛不從世輔抽刀斫之不中遂縛樞命王晞韓護送行在五月丙午世輔以其衆三千人歸宋授世輔

護國承宣使樞密行府前軍都統制賜名顯忠 按
顯忠事已詳本傳且無關於夏之興亡此二百餘言
豈非冗贅乎據顯忠傳知同州乃兀術所授其時劉
豫已廢此傳稱偽齊亦非也

吐蕃傳

咸平元年河西軍左廂副使歸德將軍折逋游龍鉢來
朝 游龍鉢疑卽喻龍波喻與游波與鉢聲皆相近
唃廝囉傳

本名欺南陵温錢逋錢逋猶贊普也羌語訛爲錢逋
長編作錢逋錢與贊聲尤相近吐蕃種族多稱折逋

亦贊普之譌也元時河西貴族有稱甘卜者或譯爲
鈐部要亦贊普之譌遼之貴臣有稱詳穩相溫詳袞
者譯字雖異要亦效漢語相公之譌

嘉祐中河州刺史王韶經略熙河 熙河之役在熙寧
中此云嘉祐中誤或中間有脫文

蠻夷傳四

高州蠻 宋初其酋田仙以地內附賜名珍州拜爲刺
史仙以郡多火災請易今名 此事已見本傳第一
卷彼云田景遷或作千此作仙蓋以遷僊字形相涉而

譌